

Auf diesen platz stell in der mit ein runde stiegen zehen schuch hoch von achtzehen staffelen / vñ ein yetli  
 che staffel mach eyns schuchs breyt so wirt der dritt sanft / vñ den Diameter oder vñstrich durch die vn  
 dersten staffel do di stiegen am breyteste ist mach hundert schuch lang so behelt der Diameter der ober  
 sten staffel sechs hundert vñd eyn vñd vierzig schuch / die stiegen dient das man darauf sehen mag wñ  
 an dem ganzen marckte geschicht vñ was man darauf feyl hab. Darnach stell mitten auf diese stiegē  
 den thuren vñd mach in vñden vierzig schuch weyt mit sanft der mauren die mach vñden dick zehen  
 schuch so beleibt der thurē inwendig holl zweynzig schuch durch den Diameter / die selbig weyten für  
 inwendig gerad / inauf dz sie gang aufrecht ste bis zum gang der gemacht soll werde daselb mach die  
 mauer fünf schuch dick so leint sich die mauer aussen vñd oben hinein / vñd wirt der thuren oben eyns  
 vierteyls schmeler dann vñden / das stet im wol an vñd tregt starck. Darnach mach den thuren von vn  
 den auf bis vñder die dachung zweyhundert schuch hoch / so wirt er seiner vñdersten weyte fünfer hoch  
 vñd inwendig im thuren mach an der mauerē zu ring herumb ein flache schnecken stiegen bis zum  
 gang hinauf / der massen weñ es not thet das man sie auch reyten möcht / zu diser stiegen brauch die  
 schnecken lini die im ersten büchlein in der. 17. figur anzeygt ist. Darnach mach ein schmalen vñ  
 gang vñb den thuren / der mauren höhe gleych / der mit dem gesims vñd allem nit weyter herhab tret  
 dan acht schuch vñd lad in drey schuch weyt auß / doch magst du das ober gesims weyter lassen für tret  
 ten. Darnach setz auf die thuren maur ein gemauerte dachung / vñ zeuch den eusseren form durch die  
 lini des ersten büchleins in der. 30. figur / aber innen hinauf zeuch die lini mit einem cirkel / so wirt die  
 dach mauer oben dünner dann vñden / vñd dise dachung mach fünffzig schuch hoch bis vñder das  
 glockhaus. Aber das glockenheuslein mach fünf schuch breyt vñd zehen hoch / vñd das ober halbeyl  
 mach offen zwischē den gsimsen mit seulen versect / vñ die / dachung darauf mach auch zehen schuch  
 hoch / vñd die gestalt des dachs wirt mit zweyen außbogen zirkellinien oben zusamen gezogen. Dar  
 nach mach die stangen knopf vñd fannē auch zehen schuch hoch. Des thurners wonung soll in der  
 dachung sein / das er auf sech / zeychen geb / vñd die or richt. Diser thuren ist hernach aufgerissen.



*[Faint, illegible text, likely bleed-through from the reverse side of the page.]*

22